

INUIT ATAQATIGIIT

Inatsisartuni



3. april. marts 2024

UPA2024/59

Naqqiut
Siunnersuut 22. marts 2024.meersoq taarserpaa
(Tungavilersuutaani naqqiisoqarpoq)

Inatsisartut Suleriaasianni § 36 naapertorlugu aalajangiiffigisassatut siunnersuut imaattoq matumuuna saqqummiuppara:

Filmiliortut isiginnaartitsisartullu nunatsinneersut nunarsuatta sinnerani filmiliaminnik filmilianiluunniit peqataaffigisaminnik takutitsisoqassatillugu peqataanissamut qanoq tapersersorneqarsinnaaneratt pillugu apeqquteqaat aallaavigalugu oqallisissiaq.

(Inatsisartunut Ilaasortaq Peter Olsen, Inuit Ataqatigiit)

Nunatsinni isiginnaartitsisartut amerlanerujartuinnartut, nunat allamiut filmiliaanni peqataasartut amerlilgaluttuinnarput. Tamanna nuannersuuvooq tulluusimaarutissaallunilu. Nuannaarutissavoq tulluusimaarutissaallunilu pissutigalugu, isiginnaartitsisartut taamatut nunat allamiut filmiliaanni peqataanermikkut, nunarput pitsaasumik nuannersumillu nittarsaattaramikku; nunarput ilisimaneqarnerulersillugulu soqutineqarnerulersittarmassuk.

Piffissamili kingullermi misilittakkat takutippaat tapersersuinikkut takutitsisinnaanerput ajorluartumik inatsisitigut killeqarpallaarujussuartoq. Assersuutigiinnarlugu filmiliaq Ivalo Oscarimut innersuunneqarmat peqataasimasut ilaat peqataajartorlutik angalanissaannut ajorluartumik tapiiffigisinnaasimangilagut, minnerunngitsumillu filmiliap nutaap Los Angelesimi takutinneqaqqaarnissaannut peqataasimasut ilaat peqataanissaannut tapiiffiginissaannut periarfissaqarsimangilagut, aningaasanut inatsimmi aammalu inatsisigut tapersersuinissatsinnut tungavissaqarsimanginnatta.

Piffissanngorpoq aningaasanut inatsimmi oqaasertaliussatigut nutarterinissatsinnut, ullumikkumullu pissutsinut naleqqussaannissatsinnut.

Aningaasarpassuarnik immikkut aningaasaleqqinngikkaluarluni, aningaasanulli inatsimmi konto 40.94.15. oqaasertaatigut allannguinnikkut nutarterinikkullu periarfissaqalersinnaagaluarpoq siunertanut qulaani pineqartunut aningaasaliissuteqarsinnaalernissatsinnut.

Konto 40.94.15. ima qulequtaqarpoq; Kultureqarnermut tungassuteqartunut isumaqatigiissutitigut pisussaaffigalugit tapiissutit. Naatsumik oqaatigalugu oqaasertaliussatigut killiliisoqarsimaneratigut konto pineqartoq taamaallaat atorpeqarsinnaavoq nunani avannarlerni killernilu kulturikkut suleqatigiiffigisanut, tassalu NAPAmut, Islandimut aamma Savalimmiunut.

Isumaqarpunga konto pineqartoq tamaallaat NAPA-mut Islandermiunut, Savalimmiormiunullu tungatinnagu, eqaannerulersillugu nunarsuatta sinneranut aamma ammanerulersinneqartariaqartoq.

Filmiliortartugut filmiliaminnik nunani allani takutitsiartornissaannut aammalu isiginnaartitsisartut nunat allamiut filmiliaannut peqataaffigisimasaminnut takutitseqqaarnissaannut peqataajartornissaannullu, angalanermut tapiissuteqarsinnaalernissarput periarfissaalertariaqarpoq.

Aningaasaliissutigut imaluunniit tapiissutigisartakkavut aningaasartuutaannartut isigineqassanngillat, siunissamulli aningaasaliinertut isigineqartariaqarput. Filmiliortartut aammalu isiginnaartitsisartut nunani allani peqataanermikkut nunarput avammut nittarsaalluartaapaat, soqutineqalersittarlugulu.

Filmiliortartugut isiginnaartitsartullu nunani allani attavinnik suleqatissaminnillu angalanermikkut pissarsiaqassapput, siunissami inuttut aningaasarsiornikkullu iluaqutigilerumaagassaminnik pissarsiaqassapput; inuit ataasiakkaat aningaasatigut iluaqutissaat aamma nunatta aningaasatigut iluaqutigilerumaassavaat.

Angalanernut, siunertanut tamaattunut eqqumiitsuliornermut aningaasaateqarfimmiit, tipsernermit lottornermilu aningaasalissutiningaaniit aammalu namminersorlutik oqartussat iluani kultureqarnermut aningaasaliissutigisartakkaniit allanit tamanit, inatsisit tunngavigalugit tapiissuteqartoqarsinnaanngilaq. Inatsisigut tunngavissaqanngilagut siunertanut tamaattunut qinnuteqaatinut tapiissuteqarnissatsinnut.

Taamaammat konto 40.94.15-mut oqaasertaliussat allanngortinneqarsinnaanerit pillugu apeqquteqaat aallaavigalugu oqallinnissamut siunnersuut saqqummiuppara, taamaalilluni inuit filmiliornerup silarsuaaniittut, soorlu filmiliortartut isiginnaartitsisartullu filmiliaminnik, filminillu peqataaffigisaminnik nunanut allanut takutitsiartornerminni qinnuteqarnerminni tapiiffigineqarsinnaalissallutik.

2024-mut aningaasanut inatsimmi kontomi 40.94.15-mi 1.056.000 koruuninik immikkoortitsisoqarnikuuvoq. Siunnersuutigaara 200.000 koruunit missaat siunertanut atorineqarsinnaasut.

Qujanaq.

Neriuppunga oqallisissiaq ilassilluarneqarumaartoq.